


雅公心政錄

檄示一




		九	漢書門
		一	
		九	
		四	
		四	
冊	架	函	號類

庫文閣內		
六	九	漢
七	一	書
函	九	
	一	
	二	
架	冊	號類

內閣文庫		
番號	漢	9194
冊數	11	(4)
函號	287	53

四



4

心政錄

檄示卷四

卷一 目錄 檄示

為飛檄飭查事

查實在乏食窮佃分別極次貧酌

為曉諭事

示應賑者聽候散給不應賑者不必再
萌妄想

為驅逐坐省家人以肅法紀等事

札諭司道府州縣

民間利弊令妥議具稟

札諭司道府州

凡所施行有不合機宜之處當據
理直言




為特立賞罰規條等事

捕緝盜案官役分別賞罰

為嚴飭修整道路等事

為通飭共凜官方等事

州縣應行事宜列欵通飭
遵照辦理府州于半年後



考核確實申報司道覆核詳定註冊以備舉劾

為嚴飭怠玩之積習等事欽部案件按限完結特設三催之法

為嚴禁蠹役擾民等事

為嚴飭整頓營伍等事

為通飭遵照事轅門三廳人役州縣當絕其往來交接

為勸民安分守法等事指出犯法罪名列欵示諭

為特檄飭遵事慎延幕賓

為通飭緝捕重懲竊賊等事

為嚴禁賭博以杜命盜之源事

為嚴行飭禁事違例抽稅強拿車騾等項累民列欵示禁

為飭禁事示禁朝山進香

為嚴禁婦女入廟燒香以端風化事

為嚴禁因公派累官價買物等事

為飭提事提解鹽當規禮銀兩備賞緝盜弁員兵役

為飭查地方情形事二麥秋禾情形收成數并地方情形令按月摺報

為飭議事乾隆四年被水州縣有無存貯應動何項採買運濟飭司妥議

為欲正民風先端士習事申飭教職約束生監

為嚴禁掛鹽之積弊以疏官引等事

諭各州縣 各宜實心辦事

為嚴禁借糶倉穀之積弊等事

為飭查收養事 收養外境本地貧民

為通飭事 大小屬員辦理公事各宜以實心行實政

為飛飭遵照事 設廠煮粥賑貧

為舉報良善等事 不論職員士庶但有良善即行申報獎勵

為勸諭愚民毋尋短見等事

卷一 檄示

為飛檄飭查事照得祥符等五十四州縣本年夏被水災荷蒙

皇上天恩多方軫恤分別災輕災重極貧次貧先既急賑一月又復加賑自三箇月起至五箇月不等其塌壞房屋損傷人口更復動項賞給

聖恩優渥無以復加猶恐州縣辦理未善上厯

宸衷前于本部堂赴豫審事之時復

命稽查辦賑事宜比因延津縣地方飢民攔輿環訴咸

稱地方官減報遺漏又因豫省佃戶向不領賑以致窮佃顛連無告殊堪憫惻是以本部院據實

奏明業經准 部議行奉

旨欽遵在案查賑濟災黎全在無遺無濫固不可使正實窮民流離失所以負

皇上子惠元元之盛心亦不可使刁民奸棍借端冒濫以致糜費倉儲且長刁惡之習今該州縣等被災之處該司曾否委員確查實在某某州縣遺漏若干其現在辦理之法務須將實係鰥寡孤獨老幼

殘疾不能存活之人逐一查出照輕重極次分別補賑其年力精壯堪以傭工度日者一概不得濫賑至從前未賑佃戶除田主力能養膳及該佃戶自能存活者無庸議賑外務須查其實在乏食窮佃酌量于明歲二三月間其極貧者補賑兩月次貧者補賑一月以資接濟至從前遺漏之處本部院已經 奏明免其處分該司即飭知各該州縣不必迴護前非固執前詳之數以致災黎不得均沾實惠亦不得因此事係本部院查奏故存迎合

之見混濫張皇以致虛糜

國帑該司仍先將現在續查出從前漏報戶口若干未賑窮佃若干約需銀穀若干限三日內將總數星飛呈報以憑察奪合亟飛行爲此仰司官吏照牌事理即便遵照毋違

乾隆四年十二月初十日

爲曉諭事照得今歲祥符等五十四州縣夏秋之間偶被水災荷蒙

皇上天恩多方軫恤除蠲免緩征平糶借給之外又復分別災輕災重極貧次貧先旣急賑一月後又加賑自三箇月起至五箇月不等其坍塌房屋損傷人口者更復給賞倍賑

聖恩稠疊無以復加猶恐地方官辦理未善上厯宸衷前于本部院赴豫審事之時復

命稽查辦賑事宜本部院因查有遺漏及佃戶向不領

賑之事恐致實在災黎顛連無告是以據實

奏明仰邀

聖明鑒照勅部議行照例查明分別補賑在案今本部院奉

命撫豫則中州百姓皆吾赤子豈有不更加愛惜之理惟是賑濟之道全在無遺無濫固不可使正實窮民不沾實惠以致流離失所亦不可使刁民奸棍借端冒濫以致糜費倉儲爾等試思百姓輸納朝廷正供每畝不過分釐升合之間今

國家議蠲議賑動逾百萬在爾等以爲今年災傷最重望賑過奢但查豫省從前被災賑濟不過三月今年被災輕者連急賑已經四月被災重者竟至半年誠亘古未有之

曠典爾等具有人心寧不感深刻骨今本部院體察輿情其間循良知感者固多而借口災民逞刁挾制希圖混冒者亦復不少卽如現在已經司府委員逐細續查酌量補賑乃本部院入境之時猶有無知刁民攔輿環訴者此皆刁頑之人倡率號召鄉

野愚民被其誘脅隨聲附和甚或婦女出頭生衿
爲首成群結隊故作哀號之狀試思爾等雖係窮
人究屬良家妻女豈可使其拋頭露面恬不爲恥
于風俗人心甚有關係至于士子爲四民之表率
不以固窮爲事反以求賑爲榮士習至此亦可浩
嘆今本部院業已酌定規條飭行藩司如果有鰥
寡孤獨老幼殘疾不能存活實係從前遺漏之人
卽予分別補賑其佃戶中除田主力能養膳及該
佃戶自能存活者無庸議賑外其實在乏食窮佃

酌量明年二三月間分別極貧者補賑兩月次貧
者補賑一月以資接濟飭令藩司查明續賑戶口
總數奏明請

旨遵行此番清查在爾等仰邀

聖主之隆恩實已至優極渥卽地方官之辦理亦已殫
力悉心各當悉心靜慮其應賑者聽候散給不應
賑者不必再萌妄想如有刁徒惡棍劣衿奸蠹再
敢煽誘生事則是爾等上負

皇上拯災恤困之聖心甘蹈囂凌惡薄之錮習本部院

愛民若子疾惡如仇必不稍爲寬貸合亟示諭爲此示仰該屬官吏軍民暨諸色人等知悉各宜感戴

皇仁凜遵示約如果能循理安分自當感召

天和現在連得瑞雪麥苗滋長轉瞬之間卽屆麥秋但得麥收豐稔自然家給人足百室盈而婦子寧本部院實有厚望焉毋違特示

乾隆四年十二月十一日

爲驅逐坐省家人以肅法紀以省冗費事照得居官賢否自有公評上司舉動何用探聽豫省各屬聞向有多差家人坐省偵探者卽此心懷疑畏已徵平日所爲况坐省家人率多積年豪僕明知本主得失念重輒敢勾通上司家人胥役借端恐嚇勒賄分肥遇事生風指名撞騙本主任爾精明焉能覺察且此輩終年在省引類呼朋酗酒嫖賭將伊主銀錢借稱使用名色任意開銷以致伊主漸成虧空種種不法難以罄指本部院下車以後屬

員賢否自有見聞舉劾必出至公彌縫絕無線索
卽欲偵探試問何益除牌示驅逐外合行通飭爲
此牌仰該司官吏文到卽便轉飭各屬嗣後除管
解錢糧等項公務必須差人赴省限日回銷外其
坐省家人盡行撤回一槩不許縱容住省倘各府
州縣敢有仍令家人坐省者一經訪聞除鎖拿該
家人及店家重處外定將伊主題叅究擬慎毋陽
奉陰違自貽後悔毋違

乾隆四年十二月十一日

札諭司道府州縣知悉照得本部院奉

命

撫豫蒞任伊始一切地方利弊民生休戚見聞未及
耳目難周該兩司職任旬宣明弼該道職任監司
知府直隸州身任表率州縣爲親民之官凡有地
方一切事宜何利當興何弊當除何事尚須整飭
何事尚須更張百姓之疾苦當籌拯救之方風俗
之囂漓當思挽回之策河渠溝洫有無水利之當
興菽粟桑麻有無地利之未盡至于弭盜安民爲
政首務况豫省盜賊繁興上厯

聖懷凡有身任地方者尤當加意留心于事未發之前
當用何法以清其源流及事既發之後當用何法
以期其必獲盜窩當如何稽查飛賊當如何防範
卽如力行保甲本屬千古美政但有治法而無治
人務虛名而無實際何補于事今當如何立法務
使牌甲肅清閭閻無擾以收實效扎論到可悉心安
議詳細具稟扎論內未盡事宜該司道府州縣如有
見解所及亦許稟聞總須剖切詳明不得以故套
常談草率塞責聽候本部院採擇舉行至嗣後凡

遇地方公務許不時具稟呈報止須據事直書不
必粉飾浮詞以憑察奪本部院卽以此覘該司道
府州縣之風力也慎之特扎論

乾隆四年十二月十二日

扎諭司道府州照得共事一方所辦皆

朝廷公事雖有寮屬之分當存勗勸之雅况人非聖賢誰能無過倘上司稍存固執自用之心下屬習成諂媚逢迎之態則公事必致貽悞本部院虛懷若谷從不堅執已見只知認真辦事不喜迎合趨承凡所施行或于地方情形尚有未合機宜之處該司道府州見解所及務必據理直言不必隱諱如果所言得當何妨即時變通即使言未合宜本部院亦不見責總期于公事有濟地方有益若所行

之事斟酌盡善意見僉同便當實力奉行不可僅存故套粉飾外觀倘明知事有未妥一味唯唯諾諾陽奉陰違本部院何以收指臂之効而共成治理乎開誠延訪幸共體之

乾隆四年十二月十八日

為特立賞罰規條以期盜息民安事照得稂莠不剪則嘉禾不殖盜賊者良民之稂莠也

國家設官分職給以俸祿加以養廉原為愛養斯民而設若使宵小公行于道路竊劫頻告于村莊良善無安枕之時室家無保聚之樂地方有司既不能防範于事前又不能緝獲于事後尸居其位若罔聞知覩然自命為民之父母安富尊榮以肥其身家試思

朝廷何賴有此等臣子百姓安用有此等官長不但曠

職而上負

君恩無顏以下對黎庶卽清夜捫心撫躬自問能不愧汗交集抱慚衾影乎今豫省盜竊之案甲于天下上厯

宸衷本部院

陛辭之日仰承

天語煌煌訓誡諄切以戢盜安民爲首務茲蒞任伊始期與二三良吏整頓精神力圖振作務使已犯者無不就獲未犯者不使復萌一洗塵案大挽頽風

惟是賞罰不立則人心不知鼓舞查獲盜之議敘以及失盜之處分

令典照然現在遵守然賞不重則人不思奮罰不嚴則人不知畏茲本部院與爾州縣官役人等約將賞罰規條臚列於後各宜振聳起聵努力盡心果能符合賞例本部院量其行能察其政績特疏保薦仰懇

聖主天恩破格錄用以示鼓勵若因循怠玩習與性成本部院必不僅叅一疎防叅一年限便爲了事定

卷一
當特疏嚴叅斷不令此等叅盜殃民之官姑容一日也自此檄行之後本部院惟有照案稽查執法辦理不復再循文告之虛套以繁案牘而厭聽聞各該州縣當共體此懷相助爲理倘能使本部院將來止用賞而無所用其罰則地方幸甚民生幸甚若或視爲具文以身嘗試則功名可惜身家更可惜也總之信賞必罰者本部院主之邀賞而招罰者該州縣主之矣合亟通飭爲此牌仰該司道府州縣官吏照牌事理分別移行一體遵照並出

示曉諭毋違

一拿獲本州縣舊案內盜首一名者該州縣記功
二次捕役賞銀三十兩拿獲夥盜一名者記功
一次捕役賞銀二十兩半年之內能三案全獲
或五案獲盜過半者將該州縣特疏薦舉捕役
除按次給賞外格外再加優賞所賞銀兩于充
公銀內動給

一拿獲本州縣新盜案者本官功過相抵如果能
于踈防限內全獲或獲盜過半並盜首盜窩者

仍姑准記功一次捕役照例給賞

一拿獲別州縣新舊案內盜首一名者該州縣除照例議敘外再記功三次捕役除照定例給賞外加賞銀五十兩夥盜一名者記功二次捕役除照例給賞外加賞銀三十兩一年之內能拿破三案者該州縣特疏薦舉捕役除按次給賞外格外再加優賞加賞銀兩勒追被盜州縣繳出移解支給

一拿獲本境外境盜窩者悉照盜首例記功給賞

一諸色人等能訪明盜犯稟官拿獲者亦照捕役例給賞該管州縣一體記功

一向來盜案最多之州縣如一年之內全無盜案者記大功三次俟別有功績一并薦舉如有諱匿從重嚴叅

一州縣舊盜案一年之內有三案不能拿破者新盜案半年之內有三案不能拿破者除照例叅處外仍行特叅捕役枷號兩箇月重責四十板仍拘禁家屬比緝

一新舊盜案被別州縣拿獲盜首一名者記過二次罰銀五十兩捕役責四十板拿獲夥盜一名者記過一次罰銀三十兩捕役責三十板所罰銀兩移解獲盜州縣以充賞給捕役之用如被別州縣拿獲三案者官則特參捕役枷號一箇月責四十板

一州縣半年之內被盜三五次者即行特參若能逐案拿獲過半姑免參處仍記大過二次如有諱匿從重參究

乾隆四年十二月十八日

爲巖飭修整道路以憑委勘事照得成梁除道政
有常經蓋以置郵傳命範我馳驅四牡皇華無嗟
行路實有關於政體非徒便于行人也豫省自彰
德以至信陽爲京廣通衢由闔鄉而達永城爲東
西大路此外次衝僻驛路徑尚多從前開溝種樹
莫不平坦整齊近年以來傾欹坑塹沒馬泥車橋
斷不修溝淤不濬路柳缺而不補雨水積久未消
庸劣有司漠不介意道路如此他政可知合行嚴
飭爲此仰司官吏照牌事理卽便轉飭所屬各將

境內道路修治平坦兩旁開挖深溝橋斷者修樹
缺者補其所種之樹不拘槐榆楊柳務令成行從
前皆因高出地面四五尺入土不及尺許是以易
于拔毀今止用三尺樹椿入土二尺地面止留一
尺庶拔毀稍難易于成活本部院于二月內委員
分頭查勘屆期如尚有未曾修補墊濬者定行
題叅至內有山崗石徑流沙鹹地不能開溝種樹者
止須修治寬平仍令據實聲明以憑察奪各宜凜
遵毋違

乾隆四年十二月十九日

爲通飭共凜官方以肅吏治事照得從來言吏治者不外清慎勤三字三者之中清之一字尤爲緊要若使操守不謹雖小有才能適足爲濟貪之具品行一隳則其人一無可取此固天下人所共知者然使操守雖爲謹飭而鬪茸因循乖張暴戾視案牘爲勞形置民瘼于膜外以此服官謂之尸曠是則此三字者雖有輕重之分要皆不可偏廢者也豫省官員其賢否行能本部院素有見聞蒞任以來披閱案卷訪察輿論頗知大概若遽登白簡

卷一
有類不教而誅是以不憚煩言頒立規條特申曉諭除貪污不職重耗虐民隱匿災傷諱飾命盜侵蝕錢糧鑽刺營私等項重情一有違犯卽當特疏糾叅者毋容載入規條又盜案賞罰業已另檄飭遵外所有州縣應實力奉行之事畧舉大端粘單臚列如左本部院逐事留心隨時察訪將來之舉劾摠視各該州縣功過之多寡以爲定衡各該州縣若素稱勤敏著有能聲者當益加奮勉以副期望若因循已久玩愒成習者當改絃易轍大加整

頓本部院寬其既往予以自新慎勿怙過不悛自甘暴棄合亟通飭爲此牌仰該司道官吏照牌內并粘單事理立卽通飭所屬一体遵照至兩司爲通省大吏表率庶官各道則職任監司秉持風憲所望同心協力稽察嚴明激濁揚清無遺無濫相與力挽頽風共成治理俾中州僚屬皆爲清慎勤之良吏本部院有厚望焉

一保甲嚴而後四境可寧也保甲之法千古善政如果門牌確實不時查點甲長牌頭互相稽察

則奸匪何所托足四境自然寧謐各州縣有能
力行保甲者記大功三次行之不善者記大過
二次全不舉行者記大過三次

一打降禁而後命案可少也豫省民風强悍一言
不合輒肆揮拳甚至刀杖相加釀成人命此皆
習於拳勇所致爲地方官者果能平時留心勸
諭講讓興仁遇有學習拳棒者卽行重責則逞
兇鬥毆之風息而人命自少各該州縣中有能
命案較前減少者記功二次較前多者記過二

次

一邪教禁而後風俗可淳也豫省崇信邪教以致
奸徒創立名目哄誘愚民假以治病消災爲由
以致羣相附和男女不分僧道混雜其志只圖
誑騙財物而聚衆旣多遂致滋事不法流毒無
窮各該州縣有能拿獲邪教一起者記功一次
漫無覺察者記大過二次

一教化行而後奸拐可少也豫省輪姦之案不一
而足關係風俗人心殊非淺鮮但與其懲治於

既犯之後孰若勸諭於未犯之先各屬於朔望
宣講

聖諭之時或踏勘相驗之便果能開誠布公諄切化導

以感發其天良則風俗自歸淳厚各該州縣凡有
輪姦強姦及強姦幼女之案或較前減少或全無
違犯或此風仍不能息酌量地方繁簡情形分別
記功記過

一剖斷明而後訟端可息也民間訐訟皆因事有
不平如果不顧情面不憚煩瑣細閱卷宗悉心

推鞠剖斷之後卽發審單事旣明允心亦輸服
何患訟端之不息各該州縣有能聽斷公平輿
論翕然者當閱案情酌量記功否則記過

一刑罰慎而後冤獄可無也三木之下何求不得
刑餘之人鄉黨不齒承問之員果能虛衷研訊
使狡猾之人不得盡其無情之詞則冤獄自無
該州縣有能不事刑求完結大案者記功一次
若妄用刑法者重則特叅輕則每案記大過二
次

一辦事勤而後案牘可清也官無大小各有專司若稍圖逸樂則案件日積日多驟難清理上煩催提下多拖累必須隨到隨辦不自寬假庶幾事無留滯而案牘可清各該州縣有案能速結又不草率者每案記功一次違則逐案記過一次

一稼穡勤而後衣食可足也民情習於便安不知遠慮全在地方官不時下鄉督率勸諭水耕火耨各就其宜春耕夏耘不違其性果能人無餘

力自然地無曠土耕九餘三旱澇有備小民自獲盈寧之慶各該州縣有勤課農桑著有成效者記大功三次全不留心者記大過二次

一浮費除而後輸將可速也錢糧絲毫顆粒皆民膏血多一分浮費卽少一分正供果能秉公徵收毫無染指催科得法無事追呼緩急因時不使稱貸則民力寬舒正賦自無拖欠各該州縣有能催科無擾或隋徵濫差者酌量地方錢糧多寡分別予記功過

一察役嚴而後善良可安也衙門皂快等役類多無賴伊等狡獪之技貪饕之性無惡不作又復聲應氣求彼此串結少不留意則良懦被其魚肉官聲由之大壞果能事事稽查時時訪察有犯必懲不少寬貸則蠹役知所畏懼善良可以樂業各該州縣有能約束衙役不使擾民者記功一次違者重則特叅輕則記大過二次

以上各條俱着落該管府州於半年後統行考察核實申報司道再加覆核詳院批定註明冊檔以備舉劾無苛無濫本部院又以此定府州之官評也慎之慎之

乾隆四年十二月十九日

爲嚴飭怠玩之積習以肅吏治事照得一切

欽部事件以及外結自理之案各有定限不容逾違
况豫省事務並非繁多何難隨到隨辦即時完結
若因循怠玩不但公務稽延徒繁案牘且小民在
官之事一日未完卽多一日之拖累况辦理迅速
則吏書胥役尚難從中撞騙倘優柔不斷觀望延
挨則伊等便得窺探意指向人說合講究百弊叢
生莫可究詰今本部院設立三催之法凡案件一
年限者至半年卽發一催八箇月發二催十箇月

發三催六箇月限者至三箇月發一催四箇月發
二催五箇月發三催四箇月限者至兩箇月發一
催兩箇半月發二催三箇月發三催兩箇月限者
至一箇月發一催四十日發二催五十日發三催
如一催二催之後案內果有難結緣由卽詳細聲
明具文報奪倘並無難結之處不行速結致發三
催該府卽提州縣經承究處仍令于三催後十日
內完結如再逾違卽解轅重懲倘州縣已經詳解
府州府州已經詳解司道而司道府州經承延擱

者則責有攸歸不容諉卸合行飭遵爲此仰司道
官吏照牌事理卽便轉飭遵照本部院法在必行
毋得視爲具文也慎之毋違

乾隆四年十二月十九日

爲嚴禁蠹役擾民以肅

功令事照得衙役之設原止供使令之役伊等久戀衙門無奸不作雖時刻隄防嚴行約束尚不能遏其狼貪虎噬之心今豫省州縣怠玩因循視衙役爲心腹言聽計從以致若輩遇事生風需索恐嚇一役到家雞犬爲之不寧一票到手親鄰皆被株累甚至擇肥而食造訪聳官地方保正散帖撒網索麥索秋科斂不已坐鄉捕役拳盜誣良囑扳私拷詐害尤甚地方各官裝聾作啞漫不經心倘有一

人告發反視爲讐敵若遇上司訪聞卽曲爲迴護
深可痛恨除現在密訪查拿外合行出示嚴禁爲
此示仰撫屬官役軍民人等知悉凡身居民上者
當以愛養斯民爲念豈可縱役滋擾在官人役當
知三尺無情有犯卽關身命軍民人等如果並無
過犯衙役鄉保敢于訛詐需索卽赴州縣稟首如
州縣平時不能查察事發又曲爲庇護許赴上司
衙門呈控提審得實官則糾叅役拿杖斃決不姑
貸各宜凜遵毋貽噬臍須至示者

乾隆四年十二月十九日

爲嚴飭整頓營伍以收實用事照得兵可百年不用不可一日不備

國家歲費百萬金錢參養士卒原期戰守有資人盡干城之選庶不負設兵衛民之意今豫省營伍廢弛已極額糧旣多虛曠技藝又復生疎盔甲旣已敝壞器械亦未整齊操演則虛應故事防守則有名無實武備如此良可浩嘆然各將弁中豈無奮發有爲之人各士卒中豈無驍勇精悍之輩總由賞罰不公勸懲未當以致士氣委靡軍容不振今

本部院力圖整頓合將欵目規條抄粘頒布各該營將弁兵丁俱當實力遵奉至于大小操期仍照舊例按期操演外所有本標馬步兵丁每逢五日輪班呈送考驗千把外委亦分班隨兵送考其分防通尉鄭三汛兵弁四季輪流隨班調考如果漢仗技勇均有可觀本部院按名給賞倘衰弱生疎步伍不齊定行分別責革該將備仍不時考察應降革者卽行降革應拔補者卽行拔補倘輪考三週之後仍無起色者定將該管將備千把外委及

所派教習之人分別記過責革果能實心訓練著有成效亦必從優獎薦本部院總以兵丁之強弱定千把之優劣卽以千把之優劣定該管將備之賢否信賞必罰以期壁壘改觀旌旗生色合亟飭遵爲此牌仰該將官識照牌事理卽便移行一體遵照毋違

乾隆四年十二月二十日

爲通飭遵照事照得官職雖有崇卑皆係

朝廷

一命之榮至于衙役人等無非備供差使伺候奔

走之人名分秩然不容紊越但從來督撫衙門三

廳門皂人等竟有敢與地方官抗衡來往者不但

啟慢上之風且恐開要挾之漸殊乖政體本部院

歷任京堂相待屬員極爲優禮而約束衙役最爲

嚴厲誠恐本衙門三廳各役有私向地方官干謁

請託之事亦未可定合行通飭爲此牌仰該司官

吏即便轉飭遵照嗣後本衙門三廳各役無論現

班下班該州縣當絕其往來勿與交接如有以私
事干謁請託者立即指名密稟以憑拿究慎勿徇
隱察出並干未便至于巡捕一官不過令傳稟公
事按季調換該地方有司亦不得餽遺交結致干
並叅母違

乾隆四年十二月二十一日

為勸民安分守法以保身家事照得專心本業則
衣食無虧不作非為則官刑不犯當此

太平盛世官不差吏不擾正好成家若遇年歲豐收夏
有麥秋有糧便能積蓄夫妻父母團聚說笑豈不
快樂乃愚蠢之人違理犯法惹是招非本部院看
他忍辱受刑喪身破家既可痛恨亦可哀憐今摘
敘數條指出罪名止用常言俗語苦口勸諭我民
其共聽之

計開

一 邪教害人最爲慘毒我民俱有父母俱有尊長能孝能敬就是修行就可求福何必聽信邪教况邪教之人心存險惡勸人吃齋念佛說得有靈有感自己奸盜詐僞實屬無法無天事未敗露止算邪教爲首者絞爲從者流事若敗露便是反叛或剛或斬妻女發遣合家問斬問流試看伊陽縣梁朝鳳們歸附張位混元邪教如今個個斬首合家發遣這就是聽信邪教榜樣

一 抗違官長最干例禁查州縣不好上司自然叅

處卽有受害亦應一人控告若成羣結黨圍城罷市鬧堂塞署自己先犯大罪爲首者斬爲從者絞試看新鄉縣關閉城門一案如今斬者斬絞者絞豈不可畏

一 強劫人財律例甚重凡人窮苦皆由懶惰或平時浪費或不習生業以致無衣少食能自改悔懶者勤費者省無業者及早習業安知將來不能成家若一時錯念強劫人財分贓到手甚屬有限及拿獲到官俱問立斬最輕也是發遣試

看歷來盜案到底拿獲者多漏網者少河南一
省每年斬決盜犯不下七八十人聞之能不寒
心

一毆打尊長律法甚嚴家有尊長自應恭敬卽有
不公也當告訴宗族理處若任性毆打致死者
罪名固重就止打傷亦按服制加等重者斬絞
輕者徒流遇秋審則闕名分不能減等論情罪
則在十惡斷難從輕試看毆尊長者歷來寬過
誰人各當忖量

一謀殺之罪常赦不原人非殺父殺兄之仇皆可
寬解卽情理難甘亦可告官審斷至于因姦不
過一時淫念圖財亦止數日浪用何苦頂一斬
罪下此毒手况人命關天斷難脫逃試看歷年
秋決大半皆是此輩可不慎之

一忿爭鬪毆易傷人命打架之事多因財物田產
口角而起稍可退讓吃虧能有幾何一至動手
必然爭勝忿極之時那顧要害既成人命破家
坐監受夾受打還要抵償爾等能于相爭之際

回想一想自然縮手若至犯罪悔亦遲矣

一強行輪姦人人切齒凡人姦淫之心多起一時想到利害必然歇手若任性橫行立干斬決重罪爲從也要問絞至于強姦幼女亦應立斬豫省頗有此風但如此重罪我民輕以身試殊不可解

一拐騙妻女豫省頗多不知男女同行最易起人疑惑若嫁賣圖財則媒合中親多人傳布易遍若自作妻妾則藏匿掩蓋難久踪跡易追况婦

人不能遠去活口終須吐露所以拐騙之案從無漏網一經到官畧誘者絞和誘及知情之人俱應發遣當思分財亦屬有限歡樂能有幾時乃犯此重罪何愚至此

一造賣紙牌最易發覺蓋因一人造賣則鄰佑保正及同居之人俱應問罪而刷印裱糊買紙賣牌等事又非暗室可爲難以瞞人一經到官爲首充軍爲從流徒所賺幾何犯此重罪試看河南造牌之家處處發覺何曾瞞得幾時爾等如

有向作此業者速將牌板自首改作別業切勿再犯

一嫁賣髮妻最爲惡俗夫婦是人倫之始貧富皆當相守卽遇荒年挨過自有熟歲或偶然吵鬧隨後仍可和好若忍心嫁賣在夫爲不義之人鄉黨輕薄在妻爲失節之婦畢世含羞况發覺到官律應滿杖財禮入官婦女歸宗人財兩失還要受刑愚民無知至此極矣可不深戒

以上十條皆豫民易犯之事身家性命所關若不速速悔改及至鎖禁獄底三拷六問父母呼號妻兒啼哭審結之後重者斬絞輕亦流徒到此地步要想安居樂業咬菜根吃薄粥過這窮日便不能矣合行出示勸諭爲此示仰通省軍民人等知悉各將此示謹記在心不識字者煩人講解凡遇財色氣忿或被人哄誘逼迫卽將此示思想一遍便可忍耐過去慎勿視爲套言有負本部院一片婆心倘仍迷而不悟干犯法紀本部院亦惟執法重處斷難爲爾等寬也凜之

慎之母違須至示者

乾隆四年十二月二十二日

爲特檄飭遵事照得州縣身膺民社一切刑名錢穀之事皆始基于此誠非一手一足之烈勢不得不延請幕賓以資贊助但勸勦之責雖在幕客而張弛之柄仍須操之于已豈可自圖安逸將案牘之事全不經心寓目一味假手他人以致草率滋弊况幕客中賢愚不等該州縣理宜細加慎選不惜多金延請名流以收指臂之效若吝財惜費只圖修金之輕省不問其人之能否則公事安能就理從前河南幕友習氣上下聯絡苟非聲氣中人

則席不能暖今此習聞雖稍減但本部院蒞任以來披閱招詳其中見解文義能中肯綮而見手筆者十不得一二其餘引斷率多紕謬議論亦復支離甚至文移中之規矩準繩亦皆未諳總由本官漫不留心幕客又非老練所致似此居官豈不上悞公事下悞功名卽如本部院亦何嘗無一二相助之人但事無大小皆出已裁隻字片紙俱經手眼從不肯委任捉刀偷一息之安逸各該州縣爲親民之官豈可玩忽悞事合行通飭爲此牌仰該

司官吏照牌事理卽轉飭各屬凡地方一切政事務須事事留心時時檢點延訪良友相助爲理固不得全托他人自圖逸樂亦不得愛惜小費延攬非人本部院卽于詳驗招案中覘該州縣之能否慎毋仍前玩視公事舛錯刺謬悞公卽以自悞也
乾隆四年十二月二十三日

爲通飭緝捕重懲竊賊清盜源以安民生事照得
鼠竊不除則大盜不息鼠竊者大盜之根苗也乃
州縣各官多視竊案爲無關考成置之膜外捕役
亦因比緝不力遂多與竊賊互通聲息以致鼠竊
狗偷之輩肆行無忌今本部院披閱各屬報竊殆
無虛日小民不能安枕盜風且必日熾合行通飭
爲此牌仰該司官吏照牌事理即便通飭所屬務
須嚴比捕役緝拿贓賊倘不獲賊即將捕役重責
仍拘禁家屬按限比緝則捕役不敢臥批與賊暗

通聲息又何患賊之不獲賊既獲務必嚴審
從前犯案次數從重究擬無稍存姑息以致輕縱
如是則本地鼠竊咸知畏懼而斂跡外境宵小亦
皆聞風而不前竊賊既除則盜劫亦可漸息地方
民生豈不幸甚倘仍前漫不加懲因循從事以姑
息爲寬大以致竊劫頻聞貽害地方役必提究官
卽飛參本部院言出必行決不爲殃民者稍存寬
典也各宜凜遵毋違

乾隆四年十二月二十六日

爲嚴禁賭博以杜命盜之源事照得開場誘賭立
法森嚴自應凜遵無犯乃訪得豫省惡習有等遊
手好閑之徒及敗落無賴之生衿人等專以擲骰
摸牌開場設局爲能或勾引良家子弟蕩其金資
或糾合無賴棍徒相爲吞噬放賬抽頭不至吸髓
剝膚不已更有一種無賴惡少專于鬧熱場集置
放寶案鋪設賭席不論他鄉別縣素不謀面之人
羣相聚賭巡查捕役逐處抽取規例鄉約地方同
居一方其間不無瞻徇不但不行查拿解究抑且

狗隱出結司牧一人耳目有限豈能周知因而賭風日熾肆無忌憚查賭博一事爲害最大或索取賭賍剝衣奪物鬪毆致命者有之或無錢償還逃往他方短見自盡者有之况愈貧愈賭愈賭愈貧始則鼠竊狗偷繼則糾夥行劫若不將此輩盡填于法何以禁絕命盜之源合亟出示嚴禁爲此示仰撫屬軍民人等知悉嗣後務宜痛改前非各安本業倘敢仍前故犯許諸色人等當場現獲賭具財物稟報到官或有關礙并許密首領役飛拿如

同賭之人據實出首免其治罪仍追還所輸財物賭犯按照定例枷責放頭抽頭之人加倍治罪典史捕役鄉約地方不時嚴查有犯必報如敢抽取規例狗容不報與賭犯同罪竇案賭席鋪放何人門首何人地內卽將地主一并究懲鄰佑照保甲法並究地方印官視爲具文不實力查拿嚴究一經本部院訪聞或經事發定以失于覺察糾叅決不寬貸各宜凜遵毋違慎之慎之

乾隆四年十二月二十六日

爲嚴行飭禁事照得本部院奉

命撫豫惟以除害安民爲要務凡利所當興者必行興
舉害所當禁者急行禁革今訪聞各屬有違例抽
稅強拿車驟攔索煤車霸賣石灰等事甚爲累民
合行條列示禁爲此示仰撫屬州縣牙行各役人
等知悉嗣後務須恪遵

功令不得妄行勒取倘敢仍蹈前轍擾累小民或經訪
聞或被告發定行嚴拿盡法究治該管州縣或知
情故縱或失於覺察分別叅處决不寬貸特示

計開

一零星徵物原無抽稅之例今各屬集鎮市棍每
每串通經承或領州縣私帖或將別帖影射凡
遇民間肩挑瓜果手携雞糠等項徵物貿易餽
口槩行抽取牙用剝削貧民各州縣務將從前
所給私帖盡行收回如有奸牙霸攔影射勒取
徵物用錢者卽行拿究毋得故縱踈忽並干咎
戾

一州縣需用車騾自應從公雇覓至於行人馱載

糧物經行往返應聽自便今各屬每遇公事需
用車騾卽差役四出將行人馱貨騾頭車輛槩
行扣留勒令卸貨備用有錢者得錢賣放無錢
者旅食守候苦累行人莫此爲甚嗣後州縣務
須公平雇募不得濫行差擾衙役人等亦不得
混拿行人裝貨車騾敢再違犯役拿杖斃官卽
嚴叅

一煤炭爲閭閻日用之需自應聽民載買如投牙
售賣方許抽收用錢今各屬煤炭奸牙每每糾

集無賴于山徑要路把守攔截每車勒錢二三十至四五十文不等殊屬肆橫嗣後各煤牙如有煤車投行售賣者方許抽用倘敢仍前攔路勒取定行嚴拿重究各州縣亦一體查拿不得漫視干咎

一民間購買石灰應聽民自行赴買今聞各屬灰窰往往遠望買灰車至卽迎坐在車勒赴伊窰價買無論土石磚瓦硬行裝給復高抬價值稍有不從肆行作踐不法已極嗣後民間買灰務

須聽其自行赴買此處灰醜價貴另赴別窰議價倘敢仍前迎車霸賣恃強作踐等弊定行立拿枷示該處俟此弊盡絕始釋各州縣亦不時查察有犯必懲慎毋故縱

乾隆四年十二月二十七日

爲飭禁事照得朝山進香男女混雜最易藏奸苟
蒙

聖明洞鑒特頒

諭旨嚴行飭禁業經 前院謄黃頒布在案茲屆歲除

聞豫省陋習每於正月間各府州縣鄉民紛紛四
出千百成羣填街塞巷其附近省會者尤必先赴
省中之城隍廟申疏焚香再往他省此中聚人既
多保無奸匪混跡且以進香爲名卽屬邪教之始
風俗人心大有關係合亟示禁爲此示仰撫屬軍

民人等知悉各宜凜遵

聖諭毋得再蹈前轍其附近省會者毋許入城進香各屬城鄉居民亦不得遠出朝山如敢故違定行拿究特示

乾隆四年十二月三十日

爲嚴禁婦女入廟燒香以端風化事照得律載軍民之家縱令妻女於寺觀神廟燒香者笞四十罪坐夫男無夫男者罪坐本婦其寺觀神廟住持不禁止者與同罪律載森嚴不容違犯蓋以婦女理宜靜守閨閣專功紡績若入廟燒香則男女混雜僧道惡少往往乘機設局或哄誘欺姦或拐帶逃匿更有故意擁擠撒村綽趣百般凌辱試思爾等無論貧富皆係良家妻女卽或年已衰老究屬婦道豈宜嬉戲閒遊放蕩心志不但招尤生事實屬

風化攸關合行出示嚴禁爲此示仰撫屬軍民人等知悉爾等無論大家小戶各當操持家務無論蚕繅紡績各宜專習女工雖所入有限而一身之衣食可資若任意嬉遊出入僧舍倘一朝被玷畢世含羞乃父乃夫何顏以對鄉井且醜名難滅穢行易傳卽子若孫亦皆受人恥辱縱云偶然入廟何致遂生事端而拋頭露面往來街市之中彼無知惡少目挑心招外觀亦甚不雅在婦女或不知道理豈家長亦不顧門風况婦女如能孝敬公姑

和睦妯娌勝于拜佛求神何必向泥塑木雕之神道焚香頂禮徒致出乖露醜獲罪招尤嗣後如有婦女仍前入寺燒香除本婦及夫男照律治罪外其住持僧道枷號一個月滿日重責四十板至各處寺廟該州縣俱編入保甲一體稽查如有聽憑婦女入寺及容留面生可疑之人者許保甲兩隣舉首倘敢徇隱查出一併責處各宜凜遵毋違須至告示者

乾隆五年正月初七日

爲嚴禁因公派累官價買物以恤民力以肅官箴
事照得官有常祿民有常供無藝之求卽爲科斂
不經之費盡屬賍私况各官額給養廉儘可辦理
公事小民終年胼胝膏血能有幾何自應加意體
卹方不愧斯民父母今聞豫省州縣每遇公事如
造冊投文修理公廨等項輒令里書鄉長辦理不
顧費從何出購買物件如薪炭米布雞豬魚肉諸
物俱派舖家行戶承值希圖短發銀錢殊不知里
書鄉長焉能自出已資勢必用一斂十科派里民

至于鋪家行戶豈肯屢虧資本必致增價售賣橫取牙用在官所省有限在民受累實多各州縣官視弊爲利恬不知怪本部院疾惡如仇斷難寬恕除檄行布政司移行各司道府廳州縣一體遵照外合亟示禁爲此示仰撫屬牙行鋪戶暨諸色人等知悉嗣後如有指稱當官及官價名色短給價值不發工銀勒派強買者立即赴轅呈控以憑拿究慎勿隱忍併干未便須至告示者

除出示曉諭外合行飭禁爲此仰司官吏照牌事理即便移會各司道通飭所屬嗣後一應公事務須督率胥役自行承辦不得混交里書鄉長至購買物件俱照時價現銀平買切毋累及牙行鋪戶視民財如己財以民累爲己累庶不負

朝廷設官養民之意倘仍利盡錙銖圖充囊橐本部院廉訪得實立即糾叅身命攸關慎毋泛視致貽伊戚并將發去告示照式抄發各司道府廳州縣一張遍貼曉諭毋違須至牌者

乾隆五年正月初七日

爲飭提事照得豫省盜案繁多獲報甚少皆由賞
罰不明是以捕役不肯用心緝捕又因地方官公
務殷繁不能專心訪緝以致盜風日熾小民不能
安枕前經本部院將州縣捕役賞罰規條飭行遵
照在案現在又遴委弁員分頭前往協緝所需給
賞并盤費銀兩斷不可少惟是司庫閒欸無多不
能源源相繼查各屬除養廉公費之外尚有鹽當
規禮一項自數十兩至一千五六百兩不等此項
銀兩原非各員應得之項祇以相沿成例若盡行

卷一
提革恐各屬員辦公未免拮据但其中有額數甚多者若不酌量飭提不特苦樂不均且非以公濟公之道茲將知府州縣鹽當規在四百兩以下同知通判鹽當規在三百兩以下者仍留本衙門備用外其有逾于此額者俱行提解司庫以爲緝盜弁員兵役給賞盤費之用夫懸重賞以緝盜賊原係地方官應辦之事本部院從公調劑代爲經理使陋規得收實用苦樂盡皆均平地方有寧謐之樂官員免叅罰之累諒各屬員必以爲公當深所

樂從也合行開單飭提爲此仰司官吏照牌事理即便轉飭所屬各照應提銀數按季解司貯庫備用如起解愆期該司卽行催提倘有借稱提解充公向鹽當各商額外取盈或借口解費折耗名色多索分釐者查出定行嚴叅其收支數目按月造入浮寄銀兩簿內報查仍按季專案造冊銷算并移臬司鹽道知照毋違

乾隆五年正月初八日

爲飭查地方情形事照得歲時豐歉皆由氣候不齊而調劑安全惟在人事補救是必先事爲未雨之綢繆臨時則繪圖而直告庶幾緩急有備雖遇災傷民無菜色但屬員錮弊每遇可喜之事如報瑞雪報時雨誇張必過其實至于民瘼重務如報水旱報冰雹則必粉飾其詞或稱田禾尚未大損或稱所損不過一隅或稱數日之內倘得如何云云尚可望其有收率多欺誑之語殊不知堯有大水湯有大旱災祲原無累于

聖德卽此一隅偏災一時荒歉題達亦何碍于考成惟
虛飾豐穰隱蔽災害以致倉無備貯民有流亡斯
爲守土之罪况我

皇上視民如傷凡遇水旱無不疊施蠲賑而爲臣子者
反有諱匿使

恩膏無由下逮貧民飢寒切膚必致爲盜爲匪地方因
而多事庸吏之害實非淺鮮合行通飭爲此仰司
官吏照牌事理卽便嚴飭所屬州縣凡申報雨雪
早澇以及冰雹蟲傷并二麥秋禾情形分數務須

據實具報不得稍有粉飾隱諱至本年二麥通州
縣約計種有幾分現在麥苗長短幾何行根是否
深透去冬天氣和暖長發過高有無妨碍歲底雨
雪是否與麥有益將來應否尚需雨澤文到立卽
詳細開報嗣後務將地方情形按月據實摺報倘
敢仍循舊習虛飾逢迎一經察出定行嚴叅并將
該員留于歉收地方罰令捐資賑恤以爲欺妄不
實之戒仍具遵依報查毋違

乾隆五年正月初十日

爲飭議事照得豫省上年被水收成歉薄市賣糧食無不昂貴目下尙有賑濟穀石貧民可以糊口將來停賑之後青黃不接戶鮮蓋藏家家需買糧食價值自必益昂急宜減價平糶以濟饑殍但各屬倉儲散賑之後已多空虛若不預爲籌畫必致臨時周章合速飭議爲此仰司官吏照牌事理卽將被水各州縣將來平糶通共約需米穀若干某處現有若干是否足用某處全無積貯應否借動公項委員前赴產糧地方採買運回平糶或令各

州縣酌量本地情形動支無碍銀兩或借領司庫公項差的當家屬賚文出境採買以濟民食該司立即通盤籌畫妥確議詳候奪至豫省民間食性以粟麥雜糧爲宜不可多買稻米再官米平糶尙恐未能普遍應飭被水各屬勸諭經商富戶如有情愿出本買糧運回糶賣者卽赴官請領印照以免隣境遏糶仍明白出示聽其買回按照本利糶賣嚴飭地方官不得勒令減價以阻商情並勸諭積穀之家乘時出糶亦不必令其減價致有畏縮

毋違速速

乾隆五年正月十八日

爲欲正民風先端士習事照得豫省地控三州峰
開二室其扶輿清淑之氣所鍾靈毓秀者代不乏
人故理學則世仰二程文章則羣推三謝亘古如
斯于今爲烈本部院性慕儒修心存樂育茲奉

命撫豫幸蒞名邦思欲培養斯文鼓舞士氣俾爲細民
之表率以庶幾懦立頑廉風俗胥歸於醇厚惟是
識良馬者必空其羣殖嘉禾者先除其莠其作興
釐剔之法則在司鐸之員化導有方舉報公當而
已爾諸生讀聖賢之書便當存聖賢之心行聖賢

之事其立身行已明體達用舉凡大端細目俱備
在

御製訓飭士子規條及卧碑之內而諸生果能認真領
會身體力行未達卽爲醇儒作鄉邦之矜式得志
卽爲循吏成

國家之棟樑豈可自甘暴棄淪于污下嗣後各屬生
監中有能居家孝友行事端方樂善好施睦婣任
卹淹通經史貫串百家閉戶潛修不與外事實係
經明行修堪以型方訓俗者本部院不惜破格獎

薦以爲多士勸其或結黨營私把持包攬武斷鄉
曲挾制官長出入衙門起滅詞訟種種行止有虧
實爲士林之敗類本部院必不肯稍存姑息留玷
宮墻至于窩賊窩娼犯奸犯賭一切下流不肖之事
本部院方不忍形諸口頰以待士子諒爾諸生中
亦不應有此匪僻之人倘或稍有違犯當不待本
部院執法痛懲想爾諸生亦不欲與此等人爲伍
必共爲鳴鼓之攻也至于教官專司訓士除每月
課藝之外尤當以正心脩身之道時加告誡使其

敦崇實學不徒事于咕嗶訓詁方稱

國家有用之才每逢舉報優劣必須矢公矢慎毋濫
毋遺庶爲稱職但從來大吏多視教職一官爲責
非親民置之膜外卽遇舉劾大約卓薦者百不得
一二至于年老一項十有八九以致寒氊冷署絕
無生色何以示鼓勵今本部院與該教官約如果
一年之內該學生儒中並無一人違條犯法者卽
係化導有方本部院當酌量大中小學予以記功
倘能使黷序之中文章則霞起雲蒸品行皆精金

美玉成德達材之士十得四五本部院不靳特疏
薦揚其或一年內該學中屢有獲罪之生監及該
學狗庇劣生不行舉報者輕則記過重則糾叅法
在必行毋貽後悔合行通飭爲此牌仰該司官吏
卽便轉飭各府州縣學一體遵照毋違

乾隆五年正月十九日

爲嚴禁掛鹽之積弊以疏官引以靖地方事照得
豫省不近場灶原無私鹽入境而人民蕃庶額引
何難疏銷其所以私販充斥官引壅滯者皆由十
府三州配食四省鹽觔各商營私罔利互相侵越
遂勾結巡丁鹽捕招集外來匪類重秤減價或賣
或賒包送出境名曰掛鹽無業窮民不知利害如
蠅逐羶羣相趨附以致私販橫行鹽引阻滯督銷
之官歲受叅處鹺政衙門屢煩改撥每遇發覺不
日賣時不知卽日人已回籍殊不知掛鹽之店俱

卷一
五
係積年巨蠹若聲勢不廣打點不周私販不敢赴
買何得諉爲不知地方有司未悉原委任其朦混
以致肆無忌憚如陽武縣鹽店費瑞雲竟敢將一
二萬斤之鹽賒給積梟崔二冒等成群結黨執械
拒捕越省發賣此等梟徒俱係亡命得利則日聚
日多必爲地方大患失利則爲竊爲強實屬遺害
閭閻况豫省素稱多盜又豈容奸商亂法釀盜殃
民若不嚴行拿禁爲害將何底止爲此示仰各商
店人等知悉爾等將本求利各宜顧惜身家凡遇

民人赴店買鹽如係本邑人民爲數無多照常售
賣倘外邑之人買鹽稍多卽當盤詰明白不得混
行賣給如敢仍立掛鹽名色通同私販一經發覺
定行執法究擬各州縣拿獲私鹽務須根究鹽觔
來歷如係鹽店知情賣給卽行嚴拿按律究治毋
得任其狡卸倘捏稱回籍卽差押店主夥計赴原
籍勒限關拿如敢徇情姑縱定行叅處決不姑貸
須至示者

乾隆五年正月二十日

諭各州縣知悉人臣服官授職全在實力辦公不徒虛文粉飾本部院到任之後所行扎檄所發告示字字出于至誠惟望一二有司共相努力使民生得所地方起色以仰副

皇上殷殷求治之至意但屬員陋習每遇查禁事件不過獲一二無關緊要之人以爲塞責其餘積惡大慙仍聽漏網或于奉行之始將一二些小之事略爲整頓至數月之後仍置高擱甚有視爲故套出一遵依照抄一示卽爲了事者以致上司心力俱

瘁而地方積弊如故盜賊如故奸宄不剪民累未除深可痛恨本部院現在密行查訪各屬員中孰勤孰惰孰真孰假孰始勤而終怠孰貌是而心非斷難逃乎洞察舉劾自有攸分也至本部院設立功過規條卽係將來

計典實蹟一功一過俱有着落切毋視爲空談以致自悞慎之勉之特諭

乾隆五年正月二十一日

爲嚴禁借糶倉穀之積弊以濟窮民以杜侵漁事照得常漕義社等倉穀石每年青黃不接之時出借以助耕耘平糶以減市價立法期于便民出納自應確實今聞豫省州縣出借倉穀恐貧乏之戶無力繳還每派紳衿富戶借領以便秋後按數取盈貧民鮮沾實惠糶谷之價則以多報少買谷之價則以少報多從中漁利以致富者苦于交息貧者告貸無門秋成穀賤則扣價入已穀貴則懸虛倉儲悞公害民莫此爲甚合飭嚴禁爲此仰司道

官吏照牌事理即便嚴飭所屬今歲出借倉穀務
擇貧乏之戶有鄉地村長保領者即行借給不得
勒派富戶平糶買補穀價必須據實開報慎勿虛
捏侵冒各宜砥礪廉隅實心任事毋再因循舊習
貪戀蠅頭致干訪叅治罪該管府州不行查揭一
併叅處慎之毋違

乾隆五年正月二十二日

爲飭查收養事照得豫省上年各屬被水貧民有
流移出境者經前院屢檄分別資送收養在案今
見各州縣報到路死乞丐甚多明係地方官並不
留心安頓以致接踵斃命殊屬違抗合行飭查爲
此仰司官吏照牌事理即便嚴飭所屬凡遇外來
流民即令鄉地人等問明如願回籍者給資遞送
回籍如原籍無可營生者即行收養俟二月後再
行資送其本地貧民如係老疾者收入普濟堂內
贍養少壯者令地方保甲代爲覓主傭佃不得任

其飄蕩倘鄉地人等不行查報以致病斃道途者
各州縣于相驗詳報文內務將該管鄉地擬罪發
落如一州一縣之內有連報三次路死乞丐者卽
係不實力奉行之員記大過一次慎之母違

乾隆五年正月二十二日

爲通飭事照得政有多端何事不應留意理惟一
定豈宜逐境而遷必須諸事毫無遺憾識見確不
可移方爲無忝厥職本部院存心至虛行事至公
自部屬以至鄉貳凡事悉循理法從無預有成見
今蒙

皇恩簡任封疆兢兢業業惟思有濟于民生何敢稍存
夫偏倚到任以來所行之事或先或後無非斟酌
乎時宜並無分子輕重恐淺識者見先行一事遂
謂本部院專重此事卽以此事迎合如現在查拿

盜賊邪教不過因豫省各官從前視盜賊邪教爲
泛常以致竊劫肆行妖言惑衆本部院不得不加
整飭是所以嚴此事者皆各屬員致之也卽盜賊
邪教之所以受此極刑者亦各屬員致之也本部
院不過因時制宜豈專重此而此外別無當行之
事乎至本部院亦偶有從寬之事其所以寬者或
原其心跡或察其平日皆本人自有可寬之道非
本部院之寬此人也若錯會意而曰本部院某事
從寬舉凡類此者槩爲寬縱則養癰貽害恐不止

如盜匪二事矣又屬員之中本部院偶有獎勵有
申飭者其所以致獎致飭之由或因一事之短長
一言之當否或者考其素行或勉其將來並非獎者
卽信爲賢員飭者卽定爲劣吏也無知者見獎一
人遂謂本部院信任此人見飭一人卽云本部院
憎惡此人其受獎受飭者或侈然自得以致怠惰
前修或頽然喪氣愈至委靡不振甚而鑽營探聽
求托黨援此皆自入陷穽自召叅劾也再通省屬
員數以百計難保無叅劾之人其貪污殘酷者固

已罪無可追矣間有些小罪過亦掛彈章者皆由其平日居官原無一長可取屢訓又不悛改既無振作之可期待有廢弛之實害是以令其去職旁觀者或視爲過嚴殊不知所以嚴者亦該員之自召非本部院于此事加嚴于此人加嚴也本部院空空洞洞大小屬員高明者導之誠實沉潛者勉其奮發或事雖未諧而心地明白者則教其留心或人雖平庸而念切功名者則鼓其精進惟冀造就一人則一方受福豈拘拘于一言一行而遽定

取舍哉總之臨民蒞政一事有一事之準繩一人有一人之作用如果認理真切卽上司所行未協何妨剖晰具詳不必盡與人同亦不必求合于上本部院最恨揣摩之習蓋揣摩則心志無定見理必然錯謬亦甚鄙迎合之風迎合則真情畢掩是非必致混淆况如此行爲則利害之心交戰于中趨避之法周布于外依違苟且無所不至又安望地方之治理哉合行通飭爲此仰司官吏照牌事理卽便移行所屬大小各官遵照嗣後辦理公事

全在實心實政切毋稍存意見倘仍不改舊習懸
揣逢迎本部院一目了然徒招鄙棄斷不能爲其
朦蔽也慎之毋違

乾隆五年正月二十五日

爲飛飭遵照事照得豫省上年偶被水災荷蒙

聖恩浩蕩蠲賑兼施撫恤備至小民得慶更生但災稜
之餘地方官吏尤當仰體

皇仁多方軫恤今祥符縣近據報到乞丐道斃者頗多
查求乞之人雖豐年亦所難免但豐年則伊等尚
有處求乞際今青黃不接百物騰貴之時此等乞
丐求乞無門尤堪憫惻亟宜拯救而急救之法莫
如煮粥一道活人最多現在司庫尚存有捐輸銀
兩理宜動支煮賑合行飛飭爲此牌仰該司官吏

文到卽將應如何多設廠所應如何派員巡查其所動捐輸銀兩若買米分給必致遲緩應如何暫動倉糧將捐輸之銀陸續照時價買補一面定議飭遵一面詳報察奪該司務須不時查察嚴督所屬實心實力奉行如敢玩視卽行據實詳報嚴叅毋違速速

乾隆五年正月二十六日

爲舉報良善以勵風俗事照得一道同風全在彰善癉惡蓋中人以下非法制禁令不足以懾其邪心而中人以上又必鼓舞作興方可以振起其秉彝之良誠使善者益勸則庸碌之輩皆知爲善之榮自必日趨于善一鄉之中善人旣多則惡者不能自容亦不敢爲惡矣卽夫子所謂舉直措諸枉能使枉者直也豫省民風素稱淳樸近年以來人心不古干犯法紀本部院斟酌時宜不得不爲治標之計是以刊刻勸諭十條指出罪名遍行曉諭

愚民咸知畏法復嚴行保甲互相稽查使奸匪不敢肆行然四民之內中人為多則鼓舞之法又不可緩如鄉曲之間有兢兢自好者若不尊之重之或致怠其初心即比閭之人見其無足輕重亦不知取法德化之所以不行風俗之所以不易者皆由于此合飭查報以示鼓勵為此仰司官吏照牌事理即便轉飭所屬于該管境內細加體訪有品行端方居家孝悌或自己守分復肯以善言勸人者或取財不苟而肯以已資周卹者更有節烈婦

女格子成例未經表揚者該州縣廉訪確實允協公評不論職員士庶即據實詳報以憑給匾獎勵自獎勵之後如遇公事接見須優禮相待使鄉黨尊崇取法倘敢偏聽草率濫舉多人以致嘉獎失宜假冒滋弊或借名傳驗送匾使胥役需索以至貧寒士庶心生畏縮者即係不肯實心教化之員一經察出定以溺職題叅不貸凜遵毋違

乾隆五年正月二十九日


爲勸諭愚民毋尋短見自輕生命事照得人之一
身上受父母恩育指望養老送終下有子女依賴
靠他成人長大雖然愚拙勤儉原可成家就是貧
窮骨肉還能團聚外人欺侮退讓何妨家室不和
吃虧便了天下無難處之事運氣有轉變之時豫
省民風强悍尚氣好勝本部院下車以來披閱各
屬詳文自盡命案每日不下四五起或口角微嫌
遽萌短見或耨鋤細故遂致輕生或兄弟之參商
或鄉鄰之萋菲或家貧乏食或負債無償或妯娌

爭持鬪口或翁姑督責過嚴或因稚子之無知或係夫妻之反目懸梁服溷溺并投河考其起釁之由無非至微之事原其致死之心不過一時之忿以致父母無依忍飢受凍妻兒失所東散西離欲免一身之苦反貽全家之累欲洩自己之忿反稱他人之願閭里鄙其無知親屬笑其非命愚蠢至此殊堪憫惻合行出示勸諭爲此示仰撫屬軍民人等知悉嗣後務須愛惜軀命共享太平一時之久焉能事事如意天下之大斷難人人富足克勤

克儉則衣食自豐忍耐吃虧則爭競自息俗語云留得青山在那怕無柴燒此身若存諸事尚有指望若一旦輕生身埋土壤事事盡屬他人雖輪迴之說不足盡憑但橫死之人往往冤魂不散卽春秋奉文設祭厲壇此等孤魂皆不給食則是一時短見不但生前苦楚死後亦復可憐爾等將本部院此示大家傳說無分男女大小箇箇牢記在心氣忿之時就把本部院說話思想一遍自然消釋切毋視爲泛常致戕身命螻蟻尚且貪生爾等具

有人形何螻蟻之不如也慎之母違

乾隆五年正月二十九日




文化丙子

三

有人形何螻蟻之不如也慎之毋違

乾隆五年正月二十九日



文化女子

心政錄

檄示卷一

心政錄

